

# «Ella era er rigurusa cun sasezza»

Partida burgais-democratica dal Grischun

DA GION NUTEGN STGIER / ANR

■ En il center da la radunanza da delegads è stà il cumià da l'antieriura cussegliera guvernativa Barbara Janom Steiner. Ultra da quai èn ils candidats per las elecziuns dal cussegl naziunal vegnids nominads uffizialmain.

La raschun per il grond interess per la radunanza da delegads a Scharans è stà il cumiau da *Barbara Janom Steiner*, ella ch'è sortida a la fin dal 2018 da la regenza pervia da limitaziun dal temp d'uffizi. Da tut las regiuns dal Grischun èn ils delegads vegnids per mussar lur attaschadadad envers l'antieriura commembra da la regenza grischuna. Quant stimada che la dunna era er en la pbd svizra conferma bain che tranter las personas ch'èn vegnidas per far onur ad ella era er *Martin Landolt*, il president svizzer da la pbd. La laudatio per Janom-Steiner ha tegnì *Gian Michael*, il deputà e schef da fracziun da la pbd grischuna.

## Diesch onns cussegliera guvernativa

La buna lavur seriosa, ses profil politic sco suppleanta deputada, sco deputada ed er sco presidenta e vicepresidenta da la partida, tuts quels uffizis sajan stads la basa per la pbd da nominar Janom Steiner il 2008 per la regenza grischuna, ha ditg Michael. Gia da lez temp hajan las autras partidas sco ch'i para gi respect da Janom Steiner, n'hajan naginas gi il curaschi da nominar in candidat per la successiun da cussegliera *Eveline Widmer-Schlumpf*. Diesch onns saja Janom Steiner stada ina magistrata cun ina clera lingua, ella haja fatg politica reala, seriosa, ella saja er stada capabla ed abla e quai sin plirs champs politics. Sia lavur na saja betg vegnida stimada mo en il parlament, mabain er ses collavuratur, e quai dad omadus departaments ch'ella haja manà,



Barbara Janom Steiner, l'antieriura cussegliera guvernativa, cun Benno Niggli, il president da la pbd grischuna.

MAD

hajan adina menziunà la buna collavuraziun cun la cussegliera guvernativa, ha punctuà Michael. Janom Steiner saja bain stada fitg rigurusa cun ses collavuratur e sias collavuraturas, dentant er cun sasezza. Tuttina haja ella er adina gi in umor cordial e simpatic.

## Ina scheffa da finanzas fidada

En connex cun il Forum mundial d'economia a Tavau saja ella en collavuraziun cun la polizia chantunala ed il militar sta-

da responsabla per la segirezza da numerus schefs da stadis, personalitads da l'economia e personas da las chasas roialas. Er en quella chaussa haja Janom Steiner testifitgà sias qualitads da star avant ad in grond stab da gronda muntada. En il mund da finanzas, en quel saja ella stada da chasa, ha ditg Michael en ses pled. Janom Steiner vegnia ad ir en l'istorgia sco «Barbara naira», haja ella preschentà en ses temp sco scheffa dal departament da finanzas be cifras nairas cun in grond

gudogn. Legendaras vegnian er a restar las debattas da l'antieriura cussegliera guvernativa cun la deputada *Angela Casanova* (pld).

## 23 fusiuns da vischnancas

Set onns saja Janom Steiner stada a la testa da l'uffizi da vischnancas. Quels set onns vegnian ad ir en l'istorgia da la refurma da vischnancas e regiuns. En ses temp sco cussegliera guvernativa saja ella stada cun success ambassadura da 23 fusiuns da vischnancas. Il dumber da vischnancas saja sa reducià da 178 sin 105 vischnancas. Ultra da quai haja Janom Steiner er contribuì bier a la refurma da las regiuns cun introducir il 2016 las 11 regiuns en noss chantun.

## Duri Campell sco leader

*Benno Niggli*, il president da la pbd da noss chantun, ha ditg che la pbd saja ina partida che sentia il puls da la populaziun. Ella saja er in partida che fetschia politica reala, ella saja er adina a la tschertga da soluziuns e saja cunzunt er cunter ina stagnaziun da refurmas. Quai che pertutga las elecziuns naziunalas ha Niggli ditg che la finamira da la pbd saja da mantegnair il sez en il cussegl naziunal. Cun *Duri Campell* (Cinuos-chel), sco leader ed actual cusseglier naziunal, dals set candidats e trais candidatas, avess quai d'esser pussaivel. La pbd grischuna va en il cumbat electoral cun duas glistas, ina glista principala ed ina glista dals giuven. Dasper Campell èn sin la glista principala anc *Stefan Darnuzer* (Claustra-Serneus), *Edith Gugelmann* (Seglias), *Martha Widmer-Spreiter* (Cuira) e *Daniel Buchli* (Val Stussavgia). A la glista dals giuven appartegnan: *Ursin Widmer* (Favugn), *Patrick Niederreiter* (Favugn), *Cindy Schnider* (Val), *Gian-Reto Trepp* (Cuira) e *Silvan Tscholl* (Domat).